

Diahuebs of diabierna e prome avion di Tiara Air ta yega Aruba



Esaki ta e Shorts 360-200 cu un capacidad di 33 asiento cu entre diahuebs y diabierna lo yega Aruba.

ORANJESTAD – Si tur cos sigui cana manera e ta bayendo actualmente, por spera cu diahuebs of diabierna awor 27 di Januari, e prome avion di Tiara Air lo aterisa na Aruba.

AVION TA NA FLORIDA

Den un entrevista cu e Commercial Manager, sr. Camilo Muyale, Bon Dia Aruba a punte con ta bayendo cu e proyecto di e avion Shorts 360-200 cu Tiara Air lo cuminsa bula cune. Sr. Muyale a duna di conoce cu tur cos ta bayendo hopi positivo. El a splica cu diabierna dia 20 di Januari, a bula e prome avion di Tiara Air for di Vancouver, Canada pa Opa-Locka, Florida door di dos 2 di Tiara Air su

pilotonan Arubano Srs. Tyron de Kort y Roland Dijkhoff.

Ta asina cu na Opa-Locka e avion lo spuit e avion den e colorman di Tiara Air. E proceso aki lo dura alrededor di tres dia.

VUELONAN DI PRUEBA

Sr. Muyale a mostra cu si tur cos ta bon, e avion lo yega Aruba diahuebs of diabierna awor, bulando via Santo Domingo. Bon Dia Aruba a puntra sr. Muyale si DCA lo mester controla e avion prome cu e haya e certificadonan necesario pa cuminsa bula.

Sr. Muyale a splica cu unbes cu e avion ya Aruba, inmediatamente lo sigui e proceso di test flights, pa e



Ariba e foto completamente na bo man robes por mira sr. Camilo Muyale, kende dia 15 di Januari a despedi di e delegacion cu a viaha pa Vancouver, Canada pa busca e prome avion y tambe hiba combersacion cu representante di Boeing Corporation pa mira e posibilidad pa haya un avion jet e aña aki mes.

compania keda certifica door di Direccion di Aviacion Civil (DCA) y asina haya su AOC pa cuminsa cu vuelonan comercial.

VUELONAN COMERCIAL

Bon Dia Aruba a puntra sr. Muyale cual ta e prome destinacion cu Tiara Air lo cuminsa bula. Sr. Muyale a splica cu e prome vuelonan

comercial lo ta entre Aruba y Curaçao. E plan ta pa diariamente tin 2 vuelo Aruba-Curaçao-Aruba y sucesivamente, lo sigui habri e otro rutan cu lo ta bay ta : Las Piedras, Valencia, Barquisimeto, Maracaibo,

Santa Martha y Barranquilla.

Sr. Muyale a duna di conoce cu Tiara Air lo tin tarifanan hopi competitivo y un servicio abordo excelente manera antes, cu un tripulacion di mando y di cabina consistiendo di yiunan di tera cu tin hopi experiencia.